



Namminersorluni inuussutissarsiutinik aallarnisaaneq ingerlatsinerlu ajornannginnerulerlunilu orniginarnerulernissaa anguniarlugu qanoq iliorsinnaanerluta pillugu oqallisissiatut siunnersuut.

(Inatsisartunut ilaasortaq Nivi Olsen, Demokraatit)

Qujanaq Demokraatit ilaasortaataannut Nivi Olsenimut apeqquteqaat aallaavigalugu oqallinnissamut siunnersuummut pitsaasumut.

Demokraatini qularutiginngilluinnarparput, suliffeqarfiit namminersortunik pigineqartut tassaammata, maani nunami aningaasatigut siuariartornermut annerpaamik nukiusussat. Ullumikkumiit annertunerujussuarmik namminersortunik peqartariaqarpugut, avammullu tunisassiorneq ukkatarinerusariaqarlugu.

Ilisimaneqartutut innuttaasut ikittunnguuvugut, nunarujussuarmi siammarluta inuusugut. Taassuma kinguneraa, nunatsinni tunisassiornerup killilerujussuunera. Taamaammallu aamma killeqarluni, suliffeqarfiup namminersortup isertissinnaasai, nunatsinniinnaq niuernerq ukkatarissaguniuk. Ima oqanngilanga, suliffinnik taamaattunik peqassanngitsugut. Soorunalimi peqassaagut, inuiaqatigiilli aningaasaqarneranut pitsaasumik kinguneri aatsaat takusinnaavagut, aallaarnisaasut pikkorissut, isummersullaqqissut suliffeqarfinnik aallartitsisinnaappata, nunat assigiinngitsut akornanni niuerfinnut sanaaminnik avammut tunisisartussanik.

Taamaattumik allatut ajornartumik namminersortunik suliffeqarfinnik aallartitsinissamut ingerlatsinissamullu pisariinnerulernissaa pilerinarnerulernissarlu sulissutigisariaqarparput. Namminersortunngorneq ajornaatsuinnaangilaq, ajutoorutaasinnaasunillu arlaqartunik peqarpoq, aallartitsisussap kisimi nammatassaanik. Imaassanngilaq, aallartitserusuttut suliniarnerminnit ersilerlutik qimaassasut imaluunniit kinguaattuussasut, pisortani allaffissornerujussuaq pissutigalugu, ikiorneqannginnerlu pissutigalugu.

Imaassanngilaq, suliap suliarineqarnera imaluunniit toqqavissamik qinnuteqarneq ima sivisitigissasoq soolu ullumikkut taamaakkajuttoq. Isumassarsiamik pitsassuugaluartumik ajoqusiinaallunilu unitsitsiinnarnermik kinguneqarsinnaavoq. Aallarnisaasoq tunniutiinnarmat, imaluunniit pineqartoq suliap ingerlanerani allamik suliassaminik nassaarmat, isertitani tigummiinnarusullugit. Tamanna pisortani eqqumaffigisariaqarpoq. Imaasllugu, pisortat suleqatitut iluatinnaatilittut isigineqalersillugit, akerlianiunngitsaq.

Taamatutaaq pingaartuuvog, ataavartumik sulinissaaq suliffeqarfiit namminersortut atugaasa pitsaanerulernissaa qulakkeerniarlugu. Qulakkeertuassavarput, ingerlatsiviit isertitaminnit akileraarutaasa tulluurtumik unammillersinnaasumillu inissisimanissaa, sapinngisamik appasinnerusumik soorlu assersuutigalugu Danmarkimiit. Tassunga atatillugu immitsinnut eqqaasittariaqarpugut, inuiaqatigiit suliffeqarfiit sorpassuartigut iluaqutigimmagit pisortat karsianut toqqaannartumik akileraasutuinnaangitsaq. Suliffeqarfiit suliffissaqartitsipput, taamaaliornikkullu tamatta



inuunerissaarnissatsinnut pigissaarnerulernissatsinnullu qulakkeerinnittuullutik.

Demokraatini isumaqarpugut, ajuusaarnartorujussuusoq, innuttaaqateqarutta sineriammi, suliffeqarfimmik aallartitsiniaraluarsimasunik imaluunniit unitsitsisimasunik peqarpat, pisortat naalleraanerat tungavigalugu. Isumaliuutigisariaqarparput suliassanik isumaginninnermut inatsit malittarisassallu sukumiisumik misissornissaat. Siunertaralugu aallarnisaasunut suliffeqarfinnullu namminersortunut ingerlareersunut pissutsit pitsaanerpaat pilersinneqarnissaat. Inuit taakku suliffeqarfiutaallu atorfissaqartippagut. Suliniutaat nunatsinnut uatsinnullu tamanut iluaqutaapput.

Imaattoqanngisaannassaaq uunga inissittugut, pisortat illuatungiliuttunngorlutik, iliunatik.

Tassalu Demokraatit oqallinnermut isummersuutigigallagaat.